



Sesida dals

27 d'avrigl 2021

Communitgà ils

30 d'avrigl 2021

Protocol nr.

385/2021

Incumbensa Maissen

concernent l'acceleraziun dal restabiliment duraivel da l'economia suenter corona

Resposta da la Regenza

La pandemia dal coronavirus tutga fermamain er l'economia grischuna, particularmain las interpresas en la chadaina da creaziun da valurs turisticas. Las consequenzas concretas n'èn dentant betg anc visiblas en tut las fassettas, cunquai ch'ins sto er analisar l'effect dals agids voluminus da la Confederaziun e dal chantun per cas da direzza. Igl è incontestà che bleras interprendidras e blers interprendiders sco er acturas turisticas ed acturs turistics da tut gener èn dumandads ordvart fitg durant la pandemia dal coronavirus. La Confederaziun ed il chantun mettan gia a disposiziun vastas mesiras da sustegn en quest connex. I dovra dentant adina er ina iniziativa da vart da las interpresas.

Tar il punct 1: Per sviluppar e per realisar novs projects pon la Confederaziun ed il chantun dar impuls cun agid dals instruments da promoziun existents e facilitar u accelerar la realisaziun da projects. Ils criteris da promoziun sco er las resursas finanzialas previsas per quest intent èn concepids a lunga vista. La Regenza vesa avunda pussaivladads per sustegnair projects da svilup e da cooperaziun cun meds da promoziun chantunals, inclusiv meds finansials en il rom da la Nova politica regiunala da la Confederaziun (NPR). En il giudicament dal cas singul è la Regenza pronta da trair a niz la libertad d'agir, applitgond ils criteris da promoziun a favur da l'economia grischuna e da singuls purtaders da projects.

L'incumbensa qua avant maun pretenda plinavant ch'ils projects servian a la «renovaziun ecologica persistenta» (tenor l'Accord da Paris davart il clima). En il rom d'in giudicament confurm al stgalim resguarda il svilup turistic e regional tut las dimensiuns da la persistenza. Sco princip da la promoziun è quai fixà er en l'art. 2 da la Lescha per promover il svilup economic en il chantun Grischun.

In'adattaziun generala dals criteris da promoziun, er mo durant in temp limità, n'è betg necessaria e cunvegnenta tenor l'avis da la Regenza. Las libertads d'agir existents èn suffizientas en il cas singul.

Tar il punct 2: Cunzunt en il sectur turistic pon las consequenzas da la pandemia dal coronavirus chaschunar ch'ils manaschis dovran lur reservas per surmontar las sfidas a curta vista e che quellas mancan lura per finanziar investiziuns futuras. Actualmain examinescha la Confederaziun, sch'i duai vegnir lantschà in program d'investiziun sin basa dals instruments da promoziun existents (Nova politica regionala, Societad svizra da credit d'hotel [SCH] e.u.v.). En quest connex duai vegnir guardà spezialmain che projects d'investiziun impurtants possian vegnir realisads er vinavant.

Ina da las sfidas futuras è en spezial quella che interpresas turisticas relevantas per las destinaziuns mantegnian l'abiltad da far investiziuns. Perquai è la Regenza pronta d'examinar in program chantunal d'impuls tranter auter per projects d'investiziun en il turissem. Eventualas mesiras chantunalas ston vegnir coordinadas stretgmain cun mesiras da la Confederaziun.

Sin basa da questas explicaziuns propona la Regenza al Cussegl grond da refusar il punct 1 e d'acceptar il punct 2 da l'incumbensa qua avant maun.



En num da la Regenza

Il president:

A handwritten signature in black ink, appearing to read "M. Cavigelli".

Dr. Mario Cavigelli

Il chancelier:

A handwritten signature in black ink, appearing to read "W. Frizzoni".

e.sub. lic. iur. W. Frizzoni